

那文毅公奏議

那文毅公籌畫回疆善後事宜奏議目錄

卷七十三

預籌布置

附叩賀

天喜

恭謝

天恩

卷七十四

籌畫西陲經費

請簡賢才置各城專閫

各城章京請復用京員舊制

整飭卡衛

卷七十五

重定戍兵額數

附訓練

慎重操防

調劑兵丁

查勘路徑

量移軍臺路

卷七十六

修建城垣

附恭謝

天恩

清查叛產

清查地糧

附糾彈

變通回疆錢法

附恭謝

天恩

變通搭放錢文舊制

卷七十七

議定外夷貿易規條

附糾彈

澄清積弊

議立茶稅

附請設三城銀庫並經管章程

卷七十八

撫馭卡內回子

請補伯克

附請補頒官員伯克關防

旌卹節義

卷七十九

剪除餘逆

改撥遣犯給官員役使

安置投回兵丁遣犯

設策擒取逆裔

附鎮制浩罕

恭謝

天恩

卷八十

收撫外夷

附糾彈

敘績保薦

附恭謝

天恩

驅逐偷住卡內安集延

善後交代

重陳西陲軍務

罷斥

飾終

那文毅公籌畫回疆善後事宜奏議卷七十三目錄

卷七十三

預籌布置

附叩賀

天喜

恭謝

天恩

那文毅公籌畫回疆善後事宜奏議卷七十三

男容安恭輯

預籌布置

附叩賀

天喜

恭謝

天恩

道光六年七月二十日

奏爲謹據愚知通籌軍需全局恭摺具陳仰乞

聖明指示事竊據清苑縣金臺驛具報本月十四日未

刻兵部六百里火票賫送

頒給陝甘總督

欽差關防過省十五日又有楊遇春五百里摺報進京

臣世受

國恩心關休戚憂疑交集正在盼望信息接據楊遇春寄知喀城回子與布魯特變亂猖獗奏請派兵救剿等情伏查慶祥駐劄喀城所帶之兵前後應有四千然賊勢既衆則獨力難支至相近之英吉沙爾及葉爾羌等城兵丁自巳調派愈形單薄恐難卽時撲滅長齡聞信自必帶兵馳往由冰嶺行走過嶺卽係阿克蘇地方相距尚不甚遠似應趕及茲蒙

皇上頒給楊遇春關防馳往勦辦

宸猷勝算定協機宜查布魯特向本恭順緣自嘉慶二

十年孜牙墩案內將吐爾第邁默特正法其子逃出
邊外遂生疑隙迨四年永芹派巴彥巴圖出卡擒
拏張格爾未獲因殺卡外無辜之布魯特朦混具
奏得邀功賞上年又因擒拏張格爾未獲復枉殺
布魯特家口以致憤激成事而巴彥巴圖因之遇
害永芹貪功粉飾巴彥巴圖妄行殺戮致啟衅端
雖內地百姓亦必激變何況外夷是布魯特之叛
亂實永芹等之有以激之也此時布魯特意在復
仇因張格爾係回子聖人之後挾之以惑回衆前
歲張格爾戕害卡倫侍衛之後布魯特原在觀望

如兵威盛而得勝則隨官兵若張格爾得利則隨逆裔今則布魯特兩次得利其勢浸成又挾張格爾以惑回衆回衆現今又在觀望倘不趁此初起示以兵威震懾人心則南路各城恐皆蠢動惟念兵貴神速當逆賊初起之時自可一撲卽滅今羣賊奔逐日久羽翼漸成若仍輕兵急進偶失機宜卽挫銳氣而賊勢反爲日張則斷不可不持之以慎慎選良將慎籌後路而於分投進剿尤宜加慎是必通籌全局布置周詳好謀而後可以成事方今之勢各城回衆均在猶疑若止一旅之師終難

奏效今相持之勢已成若慶祥處無事正可在喀
城會商勦辦否則擬當令長齡楊遇春先在阿克
蘇或葉爾羌駐劄重兵先出示曉諭安輯各城回
衆且固我後路然後調集大兵勦辦事機固不可
遲疑亦最忌冒昧急遽查喀什噶爾爲南路極邊
之地其外之哈薩克浩罕部落種類甚多厯觀史
鑑西北邊患無代無之稱兵境上無歲無之或守
之以屯戍或和親歲幣悉索中土以供外夷甚至
稱姪稱臣貽爲千秋笑柄自我

高宗純皇帝底定新疆分城鎮守碁布星羅

豐功偉烈不僅在開土開疆蓋所以重立藩籬威鎮四境
夷民輸誠向化迄今七十餘年不張一弓不折一
矢既不似歷代之勢師遠戍所省帑金何止千萬
萬而

國家體制之尊嚴實爲從古所未有承平日久好生
議論者不知遠慮見各城長年鎮守遂視新疆爲
無關緊要充其所見必以喀城遠在萬餘里其人
不足治其地不足守現既蠢動不值勞師糜餉難
保不爲退守之議殊不知我退則彼進退至何處
爲止且卡外之各部落如浩罕哈薩克等夷若聞

風效尤則邊患何所底止勞愈甚而費愈多又復成何事體爲今之計斷不能不厚集兵力大加懲創以振

國威惟是地曠城稀兵行一路孤軍難恃卽分兩路亦不足以資聲援應請分爲三路連絡聲勢始可相機併進口外與內地不同內地有義勇壯丁民夫足以助我聲威口外概屬回民雖非逆賊種類當此有事之時其心已異勢難藉以相助則兵力不可單微應請每三路各調集馬步一萬人方能得力其各城額設防兵本屬無多亦應每城酌添

十人固守城池震撫回夷以壯征兵之膽通糧運之路俾無阻滯統共約須五萬人伊犁官兵及滿洲索倫錫伯額魯特馬兵均屬得力合之烏魯木齊巴里坤等處共可酌調一萬二千甘肅陝西兩省滿漢官兵可共調二萬八千四川步兵可調七千東三省馬隊最爲得力可調三千統計調集馬步官兵五萬方敷應用兵力旣已厚集主帥尤貴得人兵分三路應請一正二副楊遇春久歷戎行誠爲一時宿將第伊於口外蒙古回子及卡外各部落情形未深知曉長齡心地雖覺慈祥而於軍

務實爲曉暢於邊地情形屢次行走均爲親歷若以之作爲正帥而以楊遇春副之再以武隆阿副之各領馬步官兵一萬爲一路事關全局則會商聯銜具奏所領本路情形亦准單銜馳報伊三人相倚而行再准其奏調所知曾歷戎行之侍衛提鎮作爲領隊俾資調遣大功無不戡定至各城本有辦事大臣現既添兵駐守亦應各添熟諳軍務之大員一二人協同籌辦方可放心大兵遠涉後路糧餉更爲緊要參考從前軍興成案哈密爲南北兩路總口應於此處設立總糧臺一座調派熟

諳軍需之道府大員總理轉運最爲緊要哈密距嘉峪關十八站陝甘總督應駐劄肅州管理分設糧臺並彈壓出關進關事務蘭州省城應設立軍需總局收發餉銀支放俸裝籌備一切軍械賁成藩臬兩司會同經管此外如涼州甘州安西州各有轉運事宜及分路隨營大小糧臺再口外之地全係戈壁每站總在七八十里百餘里不等方有水草而水草不多不足供大兵及來往運糧人馬之用或竟由山北之烏魯木齊伊犁一帶向南至冰嶺運至阿克蘇則阿克蘇爲回疆適中之地必

應設一總辦糧臺兼可照料伊犁烏魯木齊西路糧運亦須熟諳大員撥給得力道府且應駐兵三四千人方足敷用至調用馬兵旣多應請飭知鄂山英惠等先期將內外各廠馬匹調集籌備以免臨時周章其餘均可一律查照成案派員承辦程站遙遠需員較多應請勿拘資格分別奏咨飭調卽緣事叅廢之員苟非貪婪不法而曾經隨營辦過軍務者亦准收錄則用其所長人皆効力衆志可以成城衆擎亦易舉重如此通盤籌計布置周詳然後尅期前進則一鼓大功立見成就回夷震

懾永慶邊疆綏靖四海臣民無不仰見我

皇上繩

祖武而彰

國憲畏

天威而懷

帝德矣是否有當謹就

臣

一得之見繕摺具奏爲我

皇上陳之伏候

聖明採擇謹

奏

留中

道光七年十一月初五日奉

上諭那彥成現令來京直隸總督著明山署理刑部尚書著富俊署理

道光七年十一月初八日瞻

覲

道光七年十一月初九日

授欽差大臣關防籌辦回疆善後事宜奉

上諭那彥成著頒給欽差大臣關防馳驛前往喀什噶爾會同長齡等籌辦善後事宜那彥成現派出差直隸總督卽著屠之申護理明山毋庸往署

五
容安謹按時張格爾尚未就擒故有是

命

道光七年十一月初十日

奏爲酌調直隸文武員弁隨帶喀城辦理善後事宜

事竊

臣仰蒙

恩命派赴喀什噶爾會辦善後事宜趨詣

闕廷敬聆

聖訓當蒙

聖明洞鑒准令

臣

帶領文武員弁以備差遣

臣

實深感

激茲查長蘆運司札隆阿才幹不羣頗著忠勤會

充西口外糧員三年熟悉該處情形兼通回子言語大名府知府壁昌任事實心係尚書和瑛之子深知大義強幹有爲河間府同知濮城年力正強能習勞苦以上三員均堪爲臣指臂之使其武職各員直隸營伍經臣整頓兩年雖未能一無罅漏而各將備亦皆斟酌人地相宜雖未必盡善而已有得半之功若紛紛調遣遠行

畿輔地方緊要未便顧彼失此

臣

擬只帶四員查有

來將興安保遊擊萬祥本係

臣

由甘肅奏帶來直

教習兵丁技藝補授今職又都司郝永泰守備劉

正隨同

臣

差遣均尚實心得力應請一併隨帶前

往再

臣

沿途需用千把外委二十餘員容另行開

單咨部查照謹

奏

道光七年十一月初十日奉

上諭那彥成奏酌帶直隸文武員弁隨往辦理善後事

宜一摺長蘆運司札隆阿大名府知府壁昌河間府

同知濮城叅將興安保遊擊萬祥都司郝永泰守備

劉正俱著馳驛隨往喀什噶爾交那彥成差遣委用

道光七年十二月初八日

奏爲途次接奉

廷寄恭摺覆奏事竊

臣

於十二月初五日行次山西

聞喜縣境承准軍機大臣字寄道光七年十一月

二十九日奉

上諭本日據那彥成奏回至保定交代事畢已於十一月二十四日起程前進西陲道里遙遠卽趲程前往總須三月內方能行抵喀什噶爾該處善後事宜必當趁春融辦理那彥成於途次酌量有可以趲程之處卽加緊進發俾早到一日可早一日就理前據長齡等奏請斷絕各外夷貿易並嚴禁大黃茶葉出卡該夷

等或可將張逆擒獻亟須嚴防各處卡倫及開齊小路以免偷漏等語大黃茶葉係該夷等必需之物果能嚴行禁絕俾外夷無以資生藉擒獻張格爾爲求通貿易地步固屬甚善倘陽奉陰違或奸販偷漏或兵丁賣放致爲外夷所竊笑轉屬不成事體那彥成於到彼後體察情形嚴定章程辦理務須實力稽查不可有名無實再上年張逆入卡勾結煽亂各城回子從逆者固多然其中能知大義不甘從逆被害及自行殉節如和闐阿渾穆圖巴拉父子者當不乏人必須查明卹賞以勵恭順此外死事官兵跟役有隨

伊主死難者其抗志捐軀同堪矜憫前經降旨令長齡等詳查四城被害糧員侍衛官弁兵丁及効力廢員分別奏咨辦理嗣祇據籠統奏及曾否按名分晰查開造冊咨部未據續行奏明又上年逆裔將喀什噶爾滿城攻破被虜官兵三百餘人盡將髮辮剪去此內有西寧馬兵閻義額魯特兵丁巴蘭二名曾經該逆釋回送信其餘擄去官兵有無下落克城後曾否查訖明確著那彥成到彼詳查據實具奏並將各城小回子中有不甘從逆遇害及捐軀自盡者查明實在情形奏請加以恩卹其被害糧員侍衛官弁兵

丁効力廢員及伊等跟役同時死難者亦卽詳細查訪奏明給予卹賞以慰忠魂該督到喀什噶爾會同楊芳辦理善後事宜遇有應奏事件當聯銜具奏以上皆面諭未盡之言特諭令知之欽此

臣跪讀之下

仰見我

皇上宵旰憂勤無微不至曷勝欽感欽佩伏查

臣於前

月二十四日自保定起行沿途趨程進發今於初

六日行次陝西約計開年三月內總可馳抵喀城

誠如

聖諭該處善後事宜必當趁春融辦理早到一日可早

一日就理臣五吏星急亦復焦灼難名該處近日情形途次毫無知曉惟傳聞有張逆遣使投誠之說此亦其慣習伎倆前來嘗試原不可墮其詐術此時臣尚未親歷其境傳言亦不足憑總俟到彼後訪察實在情形相機辦理至於嚴禁大黃茶葉出卡俾外夷無以資生藉擒獻張逆爲求通貿易地步原屬善策但不嚴定章程則奸販偷漏兵丁賣放在所不免仰蒙

皇上聖明洞燭幾先尤當實力稽查臣竊以爲嚴禁於卡倫不過絕其流查察於各城方能清其源查大

黃茶葉由內地商民販往南路各城均其必由之路而阿克蘇更爲咽喉要路迤西各城商民均有定數無難稽考阿克蘇必須專人查核何商行何城共販若干咨明各城叅贊及各大臣按名點清以後賣與何人每回戶買茶不許過二觔大黃不許過四兩由各大臣查明定數賣後再核其數目觔兩是否相符盤有奸人代買立即查拏審辦至如此查辦商人不免受累而官役偶然藉端索詐亦所必有然不過一半年間事定後即可停止查辦臣已先行咨商各城是否能行卽當斟酌妥辦

據實馳奏其上年四城被害糧員侍衛官弁兵丁及効力廢員並伊等跟役同時盡難者迄今未據奏明造冊咨部或由本處文卷驟遭兵燹一時查造不齊自應咨查伊犁將軍烏魯木齊都統各衙門檔案以資覈實卽不能一起奏咨當就業已查明者先行奏請

恩卹以慰忠魂餘俟查訪確切再行續奏其餘各城回子不甘從逆被害及自行殉節如和闐阿渾穆圖巴拉父子者允宜仰沐

皇仁同邀卹賞又擄去官兵三百名兵丁閻義巴蘭二

名釋回外其餘有無下落統俟臣確查明晰據實
奏

聞凡茲殉節被難下及跟役回民之微我

皇上於萬幾之暇

眷念忠忱肫肫在抱率土臣民不勝感激奮興之至臣

行次甘肅省城與署督臣鄂山策畫糧餉約須耽

延半日此外不敢片刻停留得可趲程之處總當

加緊進行以期仰慰

宸廑於萬一謹

奏

道光七年十二月初八日

奏臣在京面奏求

賞派甘肅提

臣

齊慎隨赴喀城仰蒙

聖諭准

臣

途次遇見卽行帶往茲

臣

行抵西安適齊慎

過陝當卽傳述

諭旨令其隨同前往至陝甘兩省營員出色者固多但

內地亦關緊要

臣

未便多帶茲查有甘肅涼州鎮

屬大靖營遊擊米兆元陝西靖遠協營都司向榮

歷次隨

臣

出師打仗奮勉辦事明白帶往喀城均

能得力仰懇

皇上天恩准臣帶往差遣再陝甘兩省各營千把外委兵丁內向來最爲得力者酌帶數十員名前往謹奏

道光七年十二月二十五日軍機大臣字寄奉

上諭那彥成奏途次傳聞有張逆遣使投誠之說俟到彼訪查實在情形相機辦理並稱禁止大黃茶葉嚴禁於卡倫不若查察於各城等語本月初二日據長齡等奏探知張逆聞大兵陸續撤回遣回子向各愛曼借兵借糧意欲仍來搶佔喀什噶爾各布魯特知官兵甚多不甚助逆阿坦台汰劣克雖不幫助實無

拏獻之意旋據阿坦台等差人來營稟知張逆潛逃
彼處已經月餘因跟隨尚有二百餘人不敢擒拏勸
伊歸順又懼殺戮不敢投出現在哄伊搬至伊里斯
滿底處就近可探官兵信息如其肯來離卡僅有八
九百里再來稟知派官兵前往掩拏顯借投稟爲名
探聽官兵消息該督所聞張逆投誠之說自係道路
訛傳惟該逆等狼子野心詭詐是其慣伎將來那彥
成到彼縱該逆實有投誠之意總當就計誘擒相機
妥辦斷不可墮其奸謀至嚴禁大黃茶葉原可制外
夷之死命然必須稽察嚴密勿使偷漏又必須妥議

章程方免擾累該督現已咨商各城應如何核定飭
兩數目禁止官吏詐索務期斟酌詳盡既不可有名
無實致爲外夷所竊笑尤不可使商民回衆稍形滋
擾方爲妥善再據另片奏請帶提督齊慎及遊擊米
兆元等前往喀什噶爾差委前曾降旨令齊慎於回
籍治喪百日後來京陛見該督已於途次晤及准其
就近帶往甘肅大靖營遊擊米兆元陝西靖遠營都

硃

司向榮俱准其帶往差遣其陝甘兩省各營千把外
委兵丁內如有向來實在得力者准其帶帶數員名
前往不可過多該督行走甚速遇有可以趨程之處

春種片望卿成此大功也
仍當加緊進行以慰羣盼

道光七年十二月初八日

奏 臣 那彥成自入陝省潼關後連日俱遇大雪沿途
積厚七八寸至尺餘不等行過甘肅東
路之涇州平涼鞏昌二府地方以至省城雪澤應
時積厚自五六寸至七八寸高下田疇一律普沾
詢之農民實於明歲麥收大有裨益洵足上慰

聖懷

臣

於十二月十七日到蘭州與鄂山盧坤晤商一

切後卽於十九日起身前進俟到肅州出關另行

奏報謹

奏奉

硃批知道了。趕緊前進。早成大功。受速了結。善後朕心懸萬里。卿其善體朕意焉。

道光八年正月十四日

奏爲關外途次適遇紅旗捷報生擒首逆張格爾恭摺叩賀

天喜事竊_臣行抵關外安西州境據軍臺接遞長齡等紅旗捷報生擒首逆張格爾一摺_臣聞信之下欣幸抃躍莫能名狀伏思回疆自

高宗純皇帝底定以來休養生息六十餘年該回衆食毛

踐土無不深沐

天朝德澤近年以來各城叅贊辦事大臣撫馭失宜以致漸失其心前年張格爾以鴟鳥獠犬之性逞小醜跳梁之技蒙

皇上宸謨遠制

命將聲討

天戈所指四戰克復四城不旋踵而生擒首逆上溯

高宗純皇帝回疆戡定之初曾得霍集占首級茲渠魁就

獲指日獻俘

闕廷允紹

前徽更光

先烈此實我

皇上神武之英

指示方畧是以行間將帥奮揚

大武克奏膚功欽惟我

皇上初政用兵

威稜所向不數旬而卽復四城直如摧朽拉枯

丕承

先業恢

創垂之大統實吉祥之盛事從此彰

國憲而快人心不特回疆可臻乂安卽各部落如俄羅斯哈薩克布噶爾暨西北各蒙古外夷無不懷德畏

威可卜億萬年綏安永定率土臚歡普天同慶况臣受

恩深重志切同仇尤不勝踴躍歡忭之至謹

奏奉

硃批

天

祖加佑竟能成此大功實出朕意想之外忻慶之懷莫能

名狀卿仍遵前旨過赴喀什噶爾妥籌善後一切可也

道光八年正月十四日

奏此次逆回張格爾滋事仰蒙

皇上特命長齡督兵征剿

宸謨廣運指授機宜

王師臨蒞四戰克復四城

大武維揚

天威丕震實足紹

祖武而光

前烈猶以首逆稽誅上勞

宵旰復

命臣馳往會辦善後事宜臣竊以

聖主御極以來初政用兵頒發揚威將軍印信飭旅集糧布告天下大將必當一手始終其事方爲全美

今長齡仰承

廟算不旋踵而擒厥渠魁自始至終克肩鉅任

聖武昭宣實爲盡善盡美所有善後事宜長齡原奏業已熟籌周妥在先張逆竄逸屢奉

諭旨飭催或尚心存惶怖未能堅持定見有須叅議茲

元惡業已執俘要逆就擒心有把握益可措置裕如況回衆經張逆貪淫作踐衆心已寒更加震懾國威心膽俱落此時善後惟有撫卹瘡痍爲務卽諸事仍循其舊亦可底於長治久安若臣拘泥前奉諭旨仍赴喀城會辦在長齡籌畫章程已將完備臣前去和衷商榷度亦無甚紛更若就此折回又以面奉

恩諭不敢效半途之廢再四權衡進退不敢自尊惟臣所有奏帶官員及各跟役人等爲數亦幾二百有餘今旣奏明各飭回營歸伍必須按起親自料理

俾各安靜行走

臣

現在行抵安西距嘉峪關六站

擬卽折回關上一面照料各官兵分起回營便卽

恭候

諭旨如蒙

飭仍令前往略城則加站行走亦於三月內可到於行
期並無耽延或奉

命回直卽當起程回京請

訓所有

頒給

欽差大臣關防至時當令

臣

子容照恭實回京呈繳至

於臣直隸本任亦關緊要藩司久護篆務恐有控制不到之處亦復心存懸繫且臣奏帶文武員弁及

欽派侍衛各員爲數較多關外廩糧鹽菜駝折馬乾併計不支當此辦理報銷之時經費有常不得不力圖撙節是以分別飭令回任回營鄂山所派臣隨行糧臺亦一律裁撤以節糜費即使臣仍赴喀城則隨從無多並可毋庸支應謹

奏

道光八年正月十四日

奏爲會辦善後事宜無須多員差遣奏帶文武各員
分別撤留事竊臣於安西州途次適遇紅旗喜報
知張逆就獲所有善後事宜長齡等悉心籌畫自
已得有端緒此時元惡已擒其心益定更可措置
裕如惟臣在京時面請

訓示如果首逆伏誅是否仍行前往仰蒙

恩諭卽拏獲張格爾亦著前去會同長齡辦理善後各
事宜自應欽遵前奉

諭旨仍赴喀城與長齡等會商一切但先後奏帶文武
各員此去無多差遣之役亦無帶兵之任自應分

甚

別飭令回任查軍機章京戶部郎中阿達順人甚

結實體面因熟悉該處地方情形兼通回語是以

奏帶前往茲喀城業已無事該員有軍機處領班

差使緊要令其先行回京供職提

臣

齊慎木係奉

旨回籍守制之員應卽令其回籍俟百日服闋進京

陛見長蘆運司札隆阿大名府知府壁昌直隸叅將興

安保遊擊萬祥甘肅大靖營遊擊米兆元陝西靖

遠營都司向榮均有本任職守已分別檄飭各回

本任所有隨帶直隸陝甘千把外委兵丁酌留三

四十名其餘一百餘人均卽交令興安保米兆元

等管帶各回直隸陝甘各營歸伍隨行文員直隸
河間府同知濮城及西安協領德惠直隸保定營
都司郝永泰守備劉正並酌留直隸陝甘千把外
委等隨同臣赴喀以資任使又署陝甘督臣鄂山
奏派孟夏府知府武陵漢隨同臣支應沿途糧餉
現在官兵全撤毋庸供支亦飭回省銷差以節糜
費謹

奏

道光八年正月十四日

奏伊犁領隊大臣布彥泰

臣

於出京時曾奉

旨准其到時酌量調赴喀什噶爾差委臣於出關時已

行文伊犁將軍德英阿並飭知該領隊起程前往

南路茲臣所有奏

派各員均令各回本任該領隊亦應一併停止謹

奏奉

硃批知道了

道光八年正月十四日

奏昨臣將

奏帶文武各員俱令回京供職已另繕漢摺奏

聞外現在逆叛張格爾旣已生擒無事用兵都統哈朗

阿及侍衛等亦應俱令撤回所有

臣帶來

乾清門頭等侍衛舒倫保二等侍衛尤勝德三等侍衛凱明阿正黃旗委護軍叅領托雲保及由軍營撤回之頭等侍衛那里善三等侍衛桂成健銳營副叅領興安泰護軍叅領花山泰火器營委叅領巴圖魯善額外委副叅領莽阿善額外護軍校穆特布等十一員均交哈朗阿帶領由驛回京謹

奏

道光八年正月二十三日軍機大臣字寄奉

上諭那彥成奏行抵安西州境暫回嘉峪關恭候諭旨

等語前據長齡等奏生擒首逆張格爾紅旗報捷克成大功朕忻慶之懷莫能名狀現在善後一切事宜尚須妥爲辦理業經降旨令那彥成迅速馳往並令長齡詳細交代卽行來京展覲那彥成接奉此旨仍著趕緊馳赴喀什噶爾會同楊芳妥辦以便長齡交代起程欽差大臣關防仍卽帶往鈐用容照仍著隨侍前往至此時軍務雖竣仍有需員差遣之處伊犁領隊大臣布彥泰乾清門頭等侍衛舒倫保三等侍衛貴成大名府知府壁昌並該督奏請帶往之河間府同知濮城西安協領德惠直隸保定營都司郝永

泰守備劉正並酌留直隸陝甘千把外委等三四十名俱著那彥成帶往喀城以資任使其餘文武各員弁俱著回任兵丁飭令歸伍

道光七年十二月二十五日次子容照蒙

恩授正白旗蒙古副都統

道光八年正月十四日

奏爲恭謝

天恩事正月初六日

臣

於途次准軍機處字寄道光七

年十二月二十五日奉

諭旨松廷所遺正白旗蒙古副都統員缺著容照補授

欽此

臣

當卽恭設香案望

闕叩頭恭謝

天恩伏念

臣

子容照年輕識淺諸多未諳此次隨同軍

營學習並乏涓埃之效迺荷

聖主

渥沛恩綸給予優敘茲復

逾格鴻施

簡授副都統

臣

父子聞

命自

天感激無地

臣

惟有嚴勛容照教以辦事機宜俾令勤

加講求冀其稍有成就藉以仰報

高厚鴻慈於萬一所有

臣

感激微忱謹率子容照叩謝

天恩謹

奏奉

硃批知道了

道光八年二月初六日

奏爲欽奉

諭旨遵卽星馳出關兼程前赴喀城恭摺覆奏事竊

臣

於二月初二日承准軍機大臣字寄道光八年正

月二十三日奉

上諭昨據長齡等馳奏張逆已於除夕生擒檻送京師
派誠端吉勒通阿祥雲保帶領吉林黑龍江官兵押
解前來東三省官兵已經全撤哈朗阿無須再往軍
營著那彥成於何處接奉此旨卽傳知該都統會同
誠端等押解張逆來京前據那彥成奏留吉勒通阿
赴喀什噶爾差委現經長齡派令押解張逆亦卽令
其來京毋庸再行帶往現在逆首雖已就擒其善後
事宜尚須妥爲籌辦本日已降旨令長齡於交卸後
作速來京那彥成仍當遣速前赴喀什噶爾與長齡
會晤以便長齡將一切經手事件面爲交代卽帶揚

威將軍印信起程回京該督與楊芳武隆阿將應辦善後事宜協經理以副委任將此由八百里諭知那彥成並諭長齡知之欽此嗣准長齡咨稱首逆業已就擒善後事宜有楊芳武隆阿會商辦理貴大臣似可毋庸前來緩程前進在途恭候

諭旨業已附片具奏伏思此次逆回張格爾滋事

天戈所指直如拉朽摧枯四戰而克四城數月而擒元惡獻俘

闕廷

大武維揚功成神速

臣

踴躍歡忭迥出尋常惟成功既

爲不易善後亦屬綦難如果辦理妥善又可太平
數十年倘草率從事則前功盡屬虛擲但恨臣才
識短淺日夜焦思深恐有負

重任惟有竭盡庸愚才力事事虛衷商榷求其周密妥
協以期長治久安斷不敢因首逆業已就擒潦草
塞責爲苟且完善之計亦不敢喜事見長致債大
局惟求

聖明遇事嚴切

教訓俾臣辦理得有把握庶幾仰答

鴻慈臣卽日束裝星夜出關沿途加站行走三月內可

抵喀城核計日期亦無延悞俟會晤長齡時將一切事宜悉心權商接手經辦以便長齡交卸起程並將節次欽奉

諭旨交議各件會同楊芳武隆阿妥協經理隨時具奏至都統哈朗阿前經奏明飭帶侍衛各員回京茲蒙

派令會同誠端等押解張逆進京約計哈朗阿目下甫抵涼州

臣恭錄

諭旨飛遞前途令該都統折回馳赴關外迎赴前途卽會同誠端等押解首逆來京謹

奏奉

硃批知道了

道光八年二月初六日

奏臣出關後於初五日行抵布隆吉接奉

批摺並承准軍機大臣字寄道光八年正月二十五日
奉

上諭那彥成奏行抵安西州境暫回嘉峪關恭候諭旨
等語前據長齡等奏生擒首逆張格爾紅旗報捷克
成大功朕忻慶之懷莫能名狀現在一切善後事宜
尚須妥爲經理業經降旨令那彥成迅速馳往並令

長齡詳細交代卽行來京展覲那彥成接奉此旨仍著趕緊馳赴喀什噶爾會同楊芳妥辦以便長齡交代起程欽差大臣關防仍卽帶往鈐用容照仍著隨侍前往至此時軍務雖竣仍有需員差遣之處伊犁領隊大臣布彥泰乾清門頭等侍衛舒倫保三等侍衛貴成大名府知府壁昌並該督奏請帶往之河間府同知濮城西安協領德惠直隸保定營都司郝永泰守備劉正並酌留直隸陝甘千把外委等三四十名俱著那彥成帶往喀城以資任使其餘文武各員弁俱著回任兵丁飭令歸伍將此由六百里諭令知

之欽此臣當卽趕緊前進尅期赴喀以便長齡交代一切卽行入都展

覲並蒙

聖恩添派業已奏撤之伊犁領隊大臣布彥泰

乾清門頭等侍衛舒倫保三等侍衛貴成大名府知府壁昌四員仍令帶往喀城差遣除飛飭各調外再查長蘆運司札隆阿前於奏令回任後因新疆各城販賣大黃茶葉俱在涼州發行臣卽委札隆阿前往確查何商行何城歲販大黃茶葉若干以便明定章程歸入善後事宜奏辦該運司現在涼

州尚未回直且亦熟悉回疆情形居心忠實才具
開展辦事精細可資任使臣不揣冒昧劄飭該運
司於涼州查辦事竣卽兼程馳赴喀什噶爾聽候
差遣謹

奏奉

硃批札隆阿准其帶往餘知道了

道光八年二月二十六日

奏臣途次承准軍機大臣字寄道光八年正月二十
九日奉

上諭前降旨令那彥成馳赴喀什噶爾會同楊芳辦理

善後事宜以便長齡來京展覲惟現在首逆就擒大
功告成善後事宜是否尚須楊芳在彼幫辦著該督
察看情形據實具奏如無須楊芳暫留卽傳旨著與
長齡一同來京將此由六百里諭令知之欽此伏查
楊芳督兵喀城一載有餘於卡內外各處情形較
爲熟悉現在辦理善後安設增兵綠營營務亦所
深知正資集思廣益自應暫留楊芳以資商榷竊
查臣行抵阿克蘇卽有應辦善後事宜並就近赴
烏什查勘情形遵

旨赴英葉二城履勘城工由彼到喀順道前往卽不須

於抵喀後再赴各處致多往返惟時長齡亦應赴
各處親查臣何處相遇卽可就近交代以便長齡
進京臣所辦各事約有四五月之久亦可蒞事應
請暫留楊芳三四月幫臣悉心商榷俟諸事辦有
頭緒卽令先期入都復

命謹

奏奉

硃批依議

道光八年三月十八日會同揚威將軍大學士公
長公齡

奏爲在阿克蘇面晤將善後應辦事宜交代事竊臣

那彥成自二月初三日出關後沿途併站行走於

三月十三日馳抵阿克蘇臣長齡奏明於三月初

三日自喀什噶爾起程亦於十五日抵阿先經函

訂臣那彥成在阿城面晤交代茲將善後應辦一

切事宜連日悉心面爲籌商所有臣長齡會同楊

芳武隆阿擬議善後條款內如查禁大黃茶葉硝

磺安設營制更定換班官兵及防兵糧料鹽菜各

款內有須專摺具奏亦有條列具奏者皆係畢具

大綱其中條分縷晰統交臣那彥成酌商細辦臣

那彥成查原議各條先經臣等往返札商均係應辦之事惟其中有必當照辦者亦有尚須酌量變通之處臣那彥成斷不敢紛更見長亦不敢遷就草率總期於事有益又可垂之久遠方爲盡善容俟周歷各城體察情形採訪輿論隨時奏辦仰候聖明訓誨指示以冀經久無弊再臣長齡拜摺後卽於十八日起程賁印回京臣那彥成先赴烏什再由葉英二城順道查勘前赴喀城謹奏奉

硃批知道了

道光八年三月二十五日

奏爲敬陳回疆大概情形事竊

臣

於三月十三日馳

抵阿克蘇面晤揚威將軍長齡將善後應辦事宜
詳悉交代當經合詞奏

聞在案伏思此次張逆入卡滋事固由於不肖官員失
回衆之心而實因其得布魯特安集延爲之羽翼
其勢始張查布魯特向爲邊境藩籬深資其力自
嘉慶十九年辦理孜牙墩一案誤將吐爾第邁默
特凌遲該犯之子阿霍宰逃出卡外羣相煽惑此
布魯特離心之始迨永芹欺飾邀功兩次出卡妄

殺巴彥巴圖旋經被害背叛之勢已成是布魯特
意存報復助逆劫掠揆之情理激變有因獨是安
集延向隹其進卡貿易轉販內地大黃茶葉硝磺
接濟外夷漁利其流寓名城者均已私行置產安
家深沐

天朝德澤與卡內回民無異廼相率助逆戕害官兵蹂
踐回民實出情理之外深屬可惡今其種類久在
卡內貿易深知虛實往來交接聲息相通張逆藉
卡外之安集延爲爪牙藉流寓之安集延爲腹心
一經變亂遂成瓦解是張逆之變實由於失布魯

特之心自壞藩籬亦由於安集延之內外串通遂
敢鴟肆若再事姑息日久必又釀成大患臣愚昧
之見攘外必先安內內患不除卽無以善其後必
須將安集延陸續全行逐出斷不可再有因循第
據各大臣咨覆各城寄居安集延之人自數十戶
以致百餘戶不等於例原不應准其居住皆由積
年不肖官兵徇私容留回民亦便其賣買遂得內
而教誘回民仍復盤剥獲利外而私通消息以致
愈積愈多各城甚至有數百戶最少亦有數十戶
不等廢弛至此將成尾大不掉之勢但人戶旣多

刻下若同時逐出恐生事端若任其盤踞日久必
生後患臣受

恩深重斷不敢委心任運苟且遷就現已委員確查凡
在十年以內寄居與現販違禁之物者先行逐出
其餘暫准居住以安其心以後或查有偷漏大黃
茶葉出卡或查有囤積違禁物件或被人訐控有
犯卽逐陸續查辦不動聲色數年之後可以驅逐
淨盡卽臣事竣入關均交叅贊大臣督率各城大
臣認真辦理務期盡絕根株毋貽後患此外有布
噶爾巴達山等處之人皆止二三戶七八戶不等

亦嚴飭阿奇木等此內有已有家室者隨時增減
隨時具報未安家室者不准安家亦卽驅逐有房
屋者不准添蓋房屋田產不許過一百畝有逾額
者查出入官卽行驅逐其准於居住者均同回民
一律當差少有過犯立即驅逐出卡俱實力奉行
不得再有廢弛仍通行各城照辦據實咨覆叅贊
大臣每年查核具奏一次期歸實效至大黃茶葉
爲外夷必需浩罕各夷藉此養命並轉販各部落
獲利倍蓰必須嚴禁出卡示以限制以爲操縱外
夷之計現在辦茶章程蘭州官商發運涼州自涼

州則任聽往來客商隨意販至回疆各城而各城
商民回戶所用現食之茶有限皆係安集延各外
夷用重價大總收販商人惟利是圖但冀易銷獲
利不計其他此後並宜設立官商承運行銷皆係
有身家之人自知守法仍歸各城稽查以免私販
偷漏現在派員赴涼州確查並札商署督臣鄂山
改派官商承辦俟臣等議定再行具奏驅逐安集
延則外夷既不能私自購買大黃茶葉復於各城
查明回莊戶口將歲需茶葉設有定額配引行銷
若有私賣與安集延等夷之人卽照私通例治罪

又北路商人由北路歸化城等處興販襍茶領票行銷亦不知何人興販每年行銷多少大約均至巴里坤烏魯木齊後由吐魯番地方行走向來未有章程稽考臣於道光三年在陝甘時曾經與慶祥互奏現行伊犁烏魯木齊將軍都統一面嚴其經由之路一面議定章程在領票商民內撥派作爲官商亦須照蘭州設商辦理方免私與外夷交接此二事章程一定外夷知所儆懼必求通貿易不難擒獻逆裔要犯嗣後各外夷卽恭順聽命亦應照伊犁貿易亭派官經理只在來卡內交易而

退不惟在各城安家置產永絕後患爲是又查長齡奏請裁撤卡倫侍衛改設綠營弁兵業蒙

允准在案喀英葉等城現已欽遵辦理惟烏什尚設有卡倫侍衛自應一律裁撤改歸綠營伏查長齡屢次具奏各事均係祇辦喀什噶爾一處善後於各城則請歸該城大臣自行辦理而各人才具不齊或不更事遂至猶豫不免觀望現在各城善後未辦者十之八九臣重蒙

聖明倚畀不敢擅專然旣辦善後事宜則回疆均關緊要卽西四城亦多應辦之事必須處處妥協自應

會同辦理且身受

渥恩但關國計民生卽應陳奏豈敢以應辦之事轉行
推諉此後事關善後者自應隨時會商辦理以歸
畫一現已行文各該大臣遇有應辦善後事務皆
會商妥協具奏方可仰副

聖明委任至近年各城大臣及本處章京司員筆帖式
等及大小各伯克剝削回衆弊非一端此時若不
將各衙門每年應得陋規嚴行裁汰仍非撫綏回
衆之策現已咨查各城並派委員明查暗訪將陋
規逐一開報卽當勒石曉諭永遠禁除現准部咨

上年臣奏請加增各城大臣養廉已蒙

聖恩分別酌量加增其司員筆帖式等應如何加增鹽菜銀兩令臣核議籌款覆奏茲裁禁陋規專藉應得養廉等項辦公大小各官均有不敷臣擬將現辦地畝徵收糧石內籌議津貼必須無關經費官員回民兩便方可經久以上大概情形臣甫到回疆意見所及均係應辦之事理合先行奏明其餘有關善後必當查辦之件尚多容臣與楊芳武隆阿悉心斟酌隨時查

奏仰懇

聖明指示俾有遵循謹

奏奉

硃批所奏俱是另有旨諭

道光八年四月二十二日軍機大臣字寄奉

上諭那彥成奏回疆大概情形一摺所奏俱是向來安
集延進卡貿易轉販內地大黃茶葉硝磺接濟外夷
漁利其流寓各城者均已私行置產安家與卡內回
民無異乃相率助逆戕害官兵蹂踐回民實屬可惡
現在各城寄居安集延之人自數十戶至數百戶不
等那彥成已委員確查凡在十年以內寄居與現販

違禁之物者先行逐出其餘暫准居住或查有偷漏
大黃茶葉出卡或查有囤積違禁物件或被入訐控
有犯必逐此外布噶爾巴達克山等處之人亦有二三
戶七八戶不等並嚴飭阿奇木等將已有家室者隨
時增減具報未安家室者不准安家房屋不准添蓋
田產不許過百畝有逾額者查出入官其暫准居住
者與回民一律當差少有過犯立即驅逐出卡朕思
此項人數衆多相沿已久固不可姑息容留任其盤
踞貽患但欲全行逐出設辦理不善轉恐激成事端
該督務當實心體察情形持以鎮靜通行各城妥辦

並著叅贊大臣每年查核具奏一次以收實效至大黃茶葉嚴禁出卡現擬設立官商承運行銷以免私販偷漏那彥成已派員前赴涼州確查並札商鄂山必須實能絕其出卡而於卡內回民仍無不便之處方爲妥善著俟議定時卽行具奏嗣後各外夷卽恭順聽命亦應照伊犁貿易章程派官經理只准來卡交易而退不准在各城安家置產永絕後患其烏什卡倫侍衛著卽一律裁撤改歸綠營至近年各城大臣及本處章京司員筆帖式等並大小各伯克剝削回衆弊非一端必應將陋規概行裁汰前據那彥成奏

請加增各城大臣養廉業經降旨分別酌量加增其
司員筆帖式等亦著籌議加增鹽菜銀兩茲據奏擬
將現辦地畝徵收糧石內籌議津貼各城大小官員
自己足敷辦公斷不准再有收受陋規違者嚴叅懲
辦現在各該城應辦事宜尚多那彥成請與各該大
臣會商辦理所見極是此後事關善後者著隨時會
商妥議具奏

那文毅公籌畫回疆善後事宜奏議卷七十三